



GNIESSER



FASNACHT 2025

E Sauglatte Carneval

Sauglattismus in dr Stadt!
Genau das hämmer alli welle,
as es dr Schoorsch in 60 Joor
no synen Änggel ka verzelle.

E Carneval stoot vor dr Düüre
närrisch, faarbig, schreeg und düür,
dr Naar luegt häämisch hinfefüüre
und lacht ab dääre bunte Küür.
Är dänggt sich, uff dr ainte Syte,
doo isch es Glanz und Glooria,
doch dangg dr toll Polit-Elite
e düüri Sach, verdooria!
Ganz grytisch luegt är uff das Ganze
mit lyychtem Spott in syner Stimm,
und stichlet mit verbaaler Lanze
zmitts in dä Carneval-Klimbim:

Dr Stapi straalt in sym Palazzo
und fiert dört uff e Freudedanz,
au äär isch aber e Bajazzo
zmitts in däm groosse Mummeschanz.
S Tourismus-Girl Letizia
seet Gäldsegg voor sich, scho ganz bralli,
sy straalt au no in d Kamera
und sait wie d Merkel: Kömmet alli!
Es rieft dr Naar: Narri Narro!
Sy Stimm die drieft vor lutter Spott,
s Gäld vo de Stüüren isch jo doo
dr ESC griegt was är wott.

Baasel syg ganz generell
e tollii Stadt mit Charme und Bäumli,
kai Baustell, au nid griminell
wäärs wiirgglig glaubt, dä het e Dräumli.
Und woo blybt do dr Glyymaschutz
bi dääne dausige vo Flieger?
Im griene Baasel, gopffriidstutz!
Es sin doch alli Sälbschtbetrieger.
D Stadt-Sicherhait an erschter Stell
das haissts für unseri Bolizischte,
mit Doppelschichte-Karussell
und daas no näbem Stall ussmischte.
Vo dr Muba bis zur Staine
e Partymaile sonderglyyche,
wo zwoor d Nazioone duet veraine
dr Abfall aber d Luft versyyche.

Dr Contescht soo mit syne Stimme
isch im Grund gnoo userlääse,
nur wandlet är sich zum e schlimme
kommerzielle Häxebääse.
Mer froogen ys unter däm Motto:
Isch s anderscht gsii in frienre Zyte?
Mit ABBA, Udo, Lys und Toto
meh Förderer als Parasyte?
E Wäggsel het sich doo vollzooge
vo Harmony zu schreege Döön,

dr Wettbewäärb het sich verbooge
zur Freakshow mit de Büneglöön.

Es wird mit groosser Kelle doo
e Menu mit 'Kultur' aagrichtet,
als Byylaag 'Kunscht' und 'Gaschtro' gnoo
will Basel – jä! - die Stadt verpflichtet.
Dr Imagegwin syg jo enoorm,
lkoonisch! – schrybt me in dr Brässi,
Wäärtshöpfig wichtig und konfoorm
dr ganze Schwyz gilt jetz s Inträssi.

Letschtändig sin miir Baasler d Naare
bi dääre Multi-Kulti-Fluet,
wo d Oobrigkaiten offebaare
es syg jo alles toll und guet.

D Frau Carneval isch lyycht düpiert
was abgoot doo in iirer Stadt.
Dr Naar, mit Hoon, dä persifliert
und findet das Theater glatt.
Am Schluss muess jeede sälber wüsse
ebs em halt basst oder au nid,
das MEGA-Stadtfescht mit Kulisse
wo allne e bitz z dängge git.
Doch ains isch glaar, denn näabem Gäld
zellt s Zämmefiere vo Kultuure,
fäärnab vo Kämpf uff dääre Wält
wo hinter jeedem Egge luure.

D Ladäärne-Jusstellig uff em Münschterblatz goot vom
Määntig znacht bis am Mitwuch demoorge